



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE

Nr. 399/4 Prot.

Tiranë, më 5/4/2017

REKOMANDIM

Nr. 08, datë 5/4/2017

Në mbështetje të neneve 29, 30, 31 a/1, dhe 32 të Ligjit Nr.9887, datë 10.03.2008, "Për Mbrojtjen e të Dhënave Personale" i ndryshuar, neneve 77-112 të Ligjit Nr.44 datë 30.04.2015, "Kodi i Procedurave Administrative të Republikës së Shqipërisë", si dhe provave të administruara në ngarkim të kontrolluesit Kolegji Universitar "Pavarësia" Vlorë,

KONSTATOVA:

Në zbatim të Urdhrit nr. 64 datë 01/03/2017 të Komisionerit për të Drejtën e Informimit dhe Mbrojtjen e të Dhënave Personale, Drejtoria e Hetimit Administrativ kreu hetim administrativ pranë kontrolluesit Kolegji Universitar "Pavarësia" Vlorë, me objekt kontrolli:

- Zbatimi i Ligjit nr. 9887 datë 10/03/2008 "Për mbrojtjen e të dhënave personale" i ndryshuar dhe akteve të miratuara nga Komisioneri, në lidhje me mbledhjen, përpunimin, ruajtjen dhe sigurinë e të dhënave personale, gjatë kryerjes së aktivitetit të kontrolluesit Kolegji Universitar "Pavarësia" Vlorë.

Grupi i kontrollit, gjatë kryerjes së veprimeve procedurale, u asistua nga përfaqësuesit e kontrolluesit, të cilët ishin njohur me Urdhrin nr. 64 datë 01/03/2017 të Komisionerit.

Kontrolluesi, Kolegji Universitar "Pavarësia" Vlorë, është një institucion publik i arsimit të lartë, i krijuar me Vendim të Këshillit të Ministrave të Republikës së Shqipërisë. Kontrolluesi, përpunon të dhëna personale kryesisht për subjektet e dhënave "punëmarrës", "studentë" dhe "vizitorë". Përpunimi i të dhënave kryhet në mënyrë manuale (nëpërmjet dokumentacionit në formatin letër) si dhe në mënyrë elektronike nëpërmjet sistemeve të teknologjisë së informacionit të tilla si sistemi i video-vëzhgimit (CCTV), portali i studentit, portali zyrtar i institucionit, pajisje kompjuterike etj.

Gjatë hetimit administrativ të ushtruar në vend, është konstatuar se:

1. Kontrolluesi ka "Njoftuar" Zyrën e Komisionerit në lidhje me përpunimin e të dhënave personale, por konstatohet se nuk është deklaruar, kategoria e të dhënave "punëmarrës", qëllimi i përpunimit të të dhënave imazhe-video nëpërmjet sistemit të video-vëzhgimit (CCTV), përhapja e të dhënave drejt institucioneve të tjera etj.
2. Kontrolluesi mbikëqyr ambientet e brendshme dhe të jashtme nëpërmjet sistemit të video-vëzhgimit (CCTV). Kontrolluesi ka vendosur kamera edhe në zyrë me 1, 2 ose 3 punonjës si dhe në sallat e studentëve. Kontrolluesi nuk disponon rregullore apo udhëzime për funksionimin e këtij sistemi. Koha e ruajtjes e të dhënave, u gjend në datë 08/11/2016, pra 120 ditë, nga 60 ditë të lejuara.

3. Në ambientet e kontrolluesit janë vendosur tabela informuese mbi prezencën e sistemit të video-vëzhgimit (CCTV), por ato nuk janë në përputhje me modelin standard të miratuar me Udhëzimin nr. 3 të Komisionerit datë 05/03/2010 *“Mbi përpunimin e të dhënave personale me sistemin e video survejimit në ndërtesa dhe mjedise të tjera”* i ndryshuar.
4. Kontrolluesi nuk ka publikuar në portalin zyrtar <http://www.unipavarësia.edu.al/> *“Politikat e Privatësisë”*, me qëllim informimin e subjekteve të të dhënave që vizitojnë këtë portal, mbi mënyrat e përpunimit të të dhënave, masat e sigurisë, ruajtjes së konfidencialitetit, të drejtat e subjekteve të të dhënave dhe detyrimet e kontrolluesit në mbrojtje të privatësisë.

Në përfundim të kontrollit administrativ, referuar provave dhe konstatimeve në vend, grupi i kontrollit hartoi procesverbalin dhe e lexoi në prani të përfaqësuesve të kontrolluesit, të cilët u shprehën se: *“Morëm dijeni dhe do të marrim masa të menjëhershme për plotësimin e gjetjeve, brenda 5 ditëve pune dhe ato do të paraqiten me shkrim pranë Zyrës së Komisionerit”*.

Në zbatim të neneve 87-89 të Ligjit nr. 44/2015 *“Kodi i Procedurave Administrative të Republikës së Shqipërisë”*, përpara marrjes së vendimit përfundimtar, kontrolluesi Kolegji Universitar *“Pavarësia”* Vlorë është njoftuar zyrtarisht për pjesëmarrje në seancën dëgjimore që do të zhvillohej në datën 31/03/2017, për të ushtruar të drejtën e tij për tu dëgjuar.

Përfaqësuesit e kontrolluesit, në këtë seancë dëgjimore, paraqitën prova me shkrim, të cilat demonstuan rikuperimin e shkeljeve të konstatuara, që konsistojnë në:

1. Përditësimin e *“Njoftimit”* pranë Zyrës së Komisionerit, në lidhje me përpunimin e të dhënave (në zbatim të neneve 21 dhe 22 të ligjit) që me datë 16/03/2017;
2. Hartimin e rregullores për *“Përpunimin e të dhënave personale nëpërmjet sistemit të survejimit (CCTV)”*;
3. Vendosjen e tabelave informuese (sipas modelit standard të miratuar nëpërmjet Udhëzimit nr. 3 të Komisionerit datë 05/03/2010 *“Mbi përpunimin e të dhënave personale me sistemin e video survejimit në ndërtesa dhe mjedise të tjera”* i ndryshuar në ambientet në të cilat kontrolluesi ushtron aktivitetin;
4. Publikimin e *“Politikave të Privatësisë”* në portalin zyrtar të kontrolluesit Kolegji Universitar *“Pavarësia”* Vlorë, e cila përfshin të dhënat personale që përpunohen në tërësi nga kontrolluesi;

Në lidhje me pikën e dytë të konstatimeve sipas procesverbalit të datës 09/03/2017, në të cilin është vërejtur mbikëqyrje e zyrave nëpërmjet sistemit të video-survejimit (CCTV), provave të administruara, konkludoj se kontrolluesi është në shkelje të neneve 5 dhe 6 të Ligjit nr. 9887 datë 10/03/2008 *“Për mbrojtjen e të dhënave personale”* i ndryshuar :

Neni 5 – Mbrojtja e të dhënave personale: *“1/b) në grumbullimin për qëllime specifike, të përcaktuara qartë, e legjitime dhe në përpunimin në përputhje me këto qëllime”* dhe *“2) Kontrolluesi është përgjegjës për zbatimin e këtyre kërkesave në të gjitha përpunimet automatike ose me mjete të tjera të të dhënave.”*

Neni 6 - Kriteret ligjore për përpunimin dhe Udhëzimit nr. 3 të Komisionerit datë 05/03/2010 *“Mbi përpunimin e të dhënave personale me sistemin e video survejimit në ndërtesa dhe mjedise të tjera”* i ndryshuar.

- a) për përmbushjen e detyrave të përcaktuara me ligj të veçantë. Në këto raste është e nevojshme që të respektohen dispozitat e ligjit në fjalë;
- b) pa pëlqimin e subjektit por gjithnjë duke respektuar kriteret e përcaktuara në nenin 6 të ligjit *“Për Mbrojtjen e të Dhënave Personale”*.

Përdorimi i sistemit të video survejimit nuk duhet të ndërhyjë në jetën private të individëve. Përpunimi i të dhënave me anë të një sistemi video survejimi mund të lejohet vetëm nëse qëllimi për të cilin është instaluar ky sistem nuk mund të arrihet në një mënyrë tjetër. Qëllimi i regjistrimit duhet të specifikohet qartë dhe të jetë në përputhje me interesat ligjore të kontrolluesit. Regjistrimet mund të përdoren vetëm për hetimin e një ngjarje që ka sjellë dëmtimin e këtyre interesave të mbrojtura me ligj. Legjitimiteti i përdorimit të të dhënave personale të regjistruara për qëllime të tjera duhet të jetë i kufizuar vetëm për një interes të rëndësishëm publik. Si të tilla këto të dhëna të mbledhura në rrugë të paligjshme, duhet të shkatërrohen dhe duhet të hiqen kamerat vëzhguese nga zyrat e administratës.

Kontrolluesi Kolegji Universitar "Pavarësia" Vlorë ka qenë në bashkëpunim serioz me grupin e kontrollit gjatë ushtrimit të hetimit administrativ dhe ka reaguar në mënyrë të menjëhershme për rikuperimin e shkeljeve.

Sa më sipër:

Në zbatim të neneve 5, 6, 30 dhe 32/1 të Ligjit nr. 9887 datë 10/03/2008 "Për Mbrojtjen e të Dhënave Personale" i ndryshuar,

REKOMANDOJ:

1. Kontrolluesi Kolegji Universitar "Pavarësia" Vlorë, në zbatim të neneve 5 dhe 6 të Ligjit nr. 9887 datë 10/03/2008 "Për mbrojtjen e të dhënave personale" i ndryshuar:
 - Të ndalojë mbledhjen, ruajtjen dhe përpunimin e të dhënave nëpërmjet sistemit të video-survejjimit tej afatit 60 ditor;
 - Të heqë kamerat e vendosura në zyrat e administratës.
 - Të shkatërrojë të gjitha të dhënat personale imazhe-video të cilat ndodhen në sistemin e video-survejjimit (CCTV), të regjistruara nga kamerat e vendosura në zyrat e administratës.
2. Kontrolluesi Kolegji Universitar "Pavarësia" Vlorë në zbatim të nenit 32/1 të Ligjit nr. 9887 datë 10/03/2008 "Për Mbrojtjen e të Dhënave Personale" i ndryshuar, të kryejë plotësimet e detyrimeve të parashikuara në pikën e parë të këtij Rekomandimi, brenda një afati 10 ditor nga momenti i marrjes dijeni të këtij Rekomandimi.
3. Në rast mos përmbushje të këtyre detyrimeve, Komisioneri vepron sipas nenit 30/2 dhe 39 të Ligjit Nr. 9887 datë 10/03/2008 "Për Mbrojtjen e të Dhënave Personale" i ndryshuar. Komisioneri në rast shkeljesh serioze, të përsëritura ose të qëllimshme të ligjit nga një kontrollues ose përpunues, veçanërisht në rastet e përsëritura të moszbatimit të rekomandimeve të tij, vendos sanksion me gjobë për kundërvajtjet administrative dhe e denoncon publikisht ose e raporton çështjen në Kuvend dhe në Këshillin e Ministrave.

Ky Rekomandim u shpall sot më datë 5/4/2017.

